

CHINESE-JAPANESE LIBRARY
HARVARD-YENCHING INSTITUTE
02 AT HARVARD UNIVERSITY

112 JAN 1952

FT 5338 / 83 8

居士集卷第三

集三

古詩三十一首

啼鳥

窮山候至陽氣生百物如與時節爭官居荒涼草樹

密撩亂紅

一作亂紅

紫開繁英花深葉暗輝朝日日

一作

一暖衆鳥皆嚶鳴鳥言我豈解爾意綿蠻但愛聲可

聽南窓睡多春正美百舌未曉催天明黃鸝顏色已

可愛舌端啞咤如嬌嬰竹林靜啼

一作啼盡

青竹筍深處

不見惟聞聲陂田遠郭白水蒲戴勝穀穀催春耕誰



謂鳴鳩拙無用雄雌各自知陰晴雨聲蕭蕭泥滑滑
草深苔綠無人行獨有花上提葫蘆勸我沽酒花前
傾其餘百種各嘲嗒異鄉殊俗難知名我遭讒口身
落此每聞巧舌宜可憎春到山城苦寂寞把盞常恨
無娉婷花開鳥語輒自醉醉與花鳥爲交一作朋花友
能嫣然顧我笑鳥勸我飲非無情身閑酒美惜光景
惟恐鳥散花飄零可笑靈均楚澤畔離騷憔悴愁獨
醒

遊瑯琊山

南山一尺雪雪盡山蒼然澗谷深自暖梅花應已繁
使君厭騎從車馬留山前行歌招野叟共步青林間
長松得高蔭盤石堪醉眠止樂聽山鳥携琴寫幽泉
愛之欲忘返但苦世俗牽歸時始覺遠明月高峰巔

讀徂徠集

徂徠魯東山石子居山阿魯人之所瞻子與山嵯峨
今子其死矣東山復誰過精魄已埋沒文章豈能磨
壽命雖不長所得固已多舊藁偶自錄滄溟之一蠹
其餘誰付與散失存幾何存之警後世古鑑照妖魔

子生誠多難憂患靡不罹音羅官學三十年六經老研
摩問胡所專心仁義卽與軻揚雄韓愈氏此外豈知
他尤勇攻佛老奮筆如揮戈不量敵衆寡膽大身么
麼往年遭母喪泣血走岷峨垢面跣雙足鋤犁事田
坡至今鄉里化孝悌勤蠶禾昨者來太學青衫踏朝
靴陳詩頌聖德厥聲續猗那羔鴈聘黃晞晞驚走鄰
家施爲可恠駭世俗安委蛇謗口由此起中之若飛
梭上賴天子聖不挂網者羅憶在太學年大雪如翻
波生徒日盈門飢坐列鴈鴛絃誦聒鄰里唐虞賡詠

歌常續最高第騫游各名科豈止學者師謂宜國之
瞻天壽反仁鄙誰尸此偏頗不知訥訥者又忍加詆
訶聖賢要久遠毀譽暫誼譁生爲舉世疾死也一作者

魯人嗟作詩遺魯社祠子以爲歌

大熱二首

四時成萬物寒暑迭鈞陶壯陽當用事大夏蒸炎歊
造化本無情怨咨徒爾勞身微天地闊四顧無由逃
九門閭闔開萬仞崑崙高積雪寒凜凜清風吹寥寥
嗟我雖欲往而身無羽毛

歐陽文忠公全集 卷三
陽暉爍四野萬里 纖雲收羲和困路遠正午當空留
枝條不動影草木 皆含愁深林虎不嘯卧喘如吳牛
蜩蟬一何微嗟爾徒啾啾

幽谷泉

踏石弄泉流尋源入幽谷泉傍野人家四面深篁竹
漑稻滿春疇鳴渠遶茅屋生長飲泉甘蔭泉栽美木
潺湲無春冬日夜響山曲自言今白首未慣逢朱轂
顧我應可恠每來聽不足

百一一作柏子坑賽龍

嗟龍之智誰可拘出入變化何須臾壇平樹古潭水
黑沉沉影響疑有無四山雲霧忽晝合瞥起直上拏
空虛龜魚帶去半空落雷輞電走先後驅傾崖倒澗
聊一戲頃刻萬物皆涵濡青天却掃萬里靜但見綠
野如雲敷明朝老農拜潭側鼓聲坎坎鳴山隅野巫
醉飽廟門闔狼藉烏鳥爭殘餘

憎蚊

擾擾萬類殊可憎非一族甚哉蚊之微豈足汗簡牘
乾坤量廣大善惡皆含有荒茫一作荒三五前民物交

相黷禹鼎象神姦蛟龍遠潛伏周公驅猛獸人始居
 川陸爾來千百年天地得清肅大患已云除細微遺
 不錄蠅蚩蚤虱蟣蜂蝎虺蛇蝮惟爾於其間有形纔
 一粟雖微無奈衆雖小難防毒嘗聞高郵間猛虎死
 凌辱哀哉露筋女萬古雉不復水鄉自宜爾可恠窮
 邊俗晨食下帷幃盛暑泥駒犢我來守窮山地氣充
 卑溽官閑懶所便惟睡宜偏足難堪爾類多枕席厭
 緣撲燠簷一作苦烟埃燎壁疲照燭荒城繁草樹旱
 氣飛炎熇羲和驅日車當午不轉轂清風得夕涼如

赦脫囚梏掃庭露青天坐月蔭嘉木汝寧無他時

一作

日忍此見

一作見此

迫促翾翾伺昏黑稍稍出壁屋填空

來若翳聚隙多可掬叢身疑陷圍聒耳如遭突猛攘

欲張拳暗中甚

一作疑

飛鏃手足不自救其能營背腹

盤飡勞扇拂立寐僵僮僕端然窮百計還坐瞑雙目

於吾固不較在爾哉為酷誰能推物理無乃垂人欲

騶虞鳳皇麟千載不一矚思之不可見惡者無由逐

重讀徂徠集

我欲哭石子夜開徂徠編開編未及讀涕泗已漣漣

勉盡三四章收淚輒忻懽切切一作昭昭善惡戒丁

寧仁義言如聞子談論疑子立我前乃知長在世誰

謂已一作子沉泉昔也人事垂相從常苦艱今而每思

子開卷子在顏我欲貴子文刻以金玉聯金可燦而

銷玉可碎非堅不若書一作傳以紙六經皆紙傳但當

書百本一作傳十傳百以為千或落於四夷或藏在

一作於深山待彼謗焰一作艷熄放此光芒懸人生一世

中長短無百年無窮在其後萬世在其先得長多幾

何得短未足憐惟彼不可朽名聲文行然讒誣不須

辨亦止百年間百年後來者憎愛不相緣公議然後

出自然見媼妍孔孟困一生毀遂遭百端後世苟不

公至今無聖賢所以忠義士恃此死一作輕不難當

子病方革謗辭正騰喧眾人皆欲殺聖主獨保全已

埋猶不信僅免斲其棺此事古未有每思輒長嘆我

欲犯眾怒為子記此冤下紓冥冥忿仰叫昭昭天書

於蒼翠石立彼崔嵬巔詢求子世家恨子兒女頑經

歲不見報有辭未能銓一作詮忽開子遺文使我心已

寬子道自能久吾言豈須鐫

汝癭答仲儀

一作答王素汝癭

君嗟汝癭多誰謂汝土惡汝癭雖云苦汝民居自樂

鄉間同飲食男女相媒妁習俗不為嫌譏嘲豈知怍

汝山西南險平地猶磽确

一作确犖一作确磬

汝樹生擁

一作癰

腫根株浸溪壑山川固已然風氣宜其濁接境

化襄鄧餘風被伊雒思予昔曾遊所見可驚愕嗟

聞語笑纍纍滿城郭偃婦懸甕盎嬌嬰包卵殼無由

辨肩頸有類龜縮殼噫人稟最靈反不如鳧鶴駢枝

雖形累小小固

一作故

可略癰瘍暫畜聚決潰終當涸

贅疣附支體幸或不為虐未若此巍然所生非所託

咽喉繫性命鍼石難砭

一作破

削農皇古神聖為世名

百藥豈不有方書頑然莫銷爍

一作鏘

温湯汝靈泉亦

不能湔滌君官雖謫居政可瘳

一作瘳

民瘼奈何不哀

憐而反恣訶

一作朝

謔文辭騁新工醜恠極名貌汝士

雖多竒汝女少纖弱翻思太守宴誰與唱清角乖離

南北殊魂夢山陂邈握手未知期寄詩

一作書

聊一喙

滄浪亭

一本上云寄題子美

子美寄我滄浪吟邀我共作賦

一作賦

滄浪篇滄浪有景

不可到使我東望心悠然荒灣野水氣象古高林翠
 阜相回環新篁抽笋添夏影一作景老柝亂發爭春妍
 水禽閑暇事高格山鳥日夕相啾喧不知此地幾興
 廢仰視喬木皆蒼煙堪嗟人迹到不遠雖有來路曾
 無緣窮竒極恠誰似子搜索幽隱探神仙初尋一逕
 入叢密豁目異境無窮邊風高月白最宜夜一片瑩
 淨鋪瓊田清光不辨水與月但見空碧涵漪漣一有姑蘇
 臺邊人響絕夜靜清風明月本無價可惜祗賣四萬
 錢又疑此境一作景天乞與壯士憔悴天應憐鴟夷古

亦有獨往江湖波濤渺翻天崎嶇世路欲脫去及以
 身試蛟龍淵豈如一作知扁舟任飄瓦紅渠綠浪搖醉
 眠丈夫身在豈長弃新詩美酒一作詩聊窮年雖然
 不許俗客到莫惜佳句人間傳

寶劍

寶劍匣中藏暗室夜常一作向明欲知天將雨鐸爾劍
 有聲神龍本一物氣類感則鳴常恐躍匣去有時暫
 開鎬疑止當煌煌七星文照耀三尺冰此劍在人間
 百妖夜收形姦兇與佞媚膽破骨亦驚試以向星月

國朝文忠公全集卷三
飛光射攬搶藏之武庫中可息天下兵奈何狂胡兒
尚敢邀金繒

秋晚凝翠亭

探韻作

黃葉落

一作落
葉滿

空城青山遶官解風雲淒已高歲月

驚何邁陂田寒未收野水淺生派晴林紫榴坼霜日
紅梨曬蕭疎喜竹勁寂寞傷蘭敗叢菊如有情幽芳
慰孤介嘉客日可携寒醅美新醅音債登臨無厭頰冰
雪行即屆

菱溪大

一本無
大字

石

新霜夜落秋水淺有石露出寒溪垠苔昏土蝕禽鳥
啄出沒溪水秋復春溪邊老翁生長見疑我來視何
殷勤愛之遠徙向幽谷曳以三犢載兩輪行穿城中
罷市看但驚可恠誰復珍荒烟野草埋沒久洗以石
竇清冷泉朱欄綠竹相掩映選一作邀致佳處當南軒
南軒旁列千萬峯曾未有此竒嶙峋乃知異物世所
少萬金爭買傳幾人山河百戰變陵谷何爲落彼荒
溪濱山經地誌不可究遂令異說爭紛紜皆云女媧
初鍛鍊融結一氣凝精純仰視蒼蒼補其缺染此紺

區陽文公全集卷三
碧瑩且溫或疑古者燧人氏鑽以出火為炮燔苟非
神聖親手迹不爾孔竅一作誰雕刻又云漢使把漢
節西北萬里窮崑崙行經于闐得寶玉流入中國隨
河源沙磨水激自穿穴所以鐫鑿無瑕痕嗟予有口
莫能辨嘆息但以兩手捫盧仝韓愈不在世彈壓百
恠無雄文爭奇鬪異各取勝遂至荒誕無根原天高
地厚靡不有一作醜好萬狀奚足論惟當掃雪席其
側日與嘉客陳清罇

送姜秀才遊蘇州

憶從太學諸生列我尚弱齡君秀發同時並薦幾存
亡一夢十年如倏忽壯心君未減青春多難我今先
白髮山花撩亂鳥綿蠻更盡一罇明日別

送孫秀才

高門煌煌赫如赭勢利聲名爭借假一作嗟哉子獨

不顧之訪我千山一羸馬明珠渡水覆舟失贈我璣

貝猶滿把

生携文數十篇見訪渡江而失

遲遲顧我不欲去問我無

窮慚報寡時之所弃子獨嚮無乃與世異取捨

新霜二首

天雲慘慘秋陰薄卧聽北風鳴屋角平明驚鳥四散
飛一夜新霜群木落南山鬱鬱舊可愛千仞巉巖如
刻削林枯山瘦失顏色我意豈能無寂寞衰頰得酒
猶彊發可醉豈須嫌酒濁泉傍菊花芳爛熳短日寒
輝相照灼無情木石尚須老有酒人生何不樂

荒城草樹多陰暗日夕霜雲意濃淡長淮漸落見洲

渚野潦初清一作晴收瀲灩蘭枯蕙死誰復吊殘菊籬

根爭豔豔青松守節見臨危正色凜凜不可犯芭蕉

菱荷不足數狼藉徒能污池檻時行收斂歲將窮冰

雪嚴凝從此漸咿啣兒女感時節愛惜朱顏屢窺鑑

惟有壯士獨悲歌拂拭塵埃磨古劍

豐樂亭小飲

造化無情不擇物春色亦到深山中山桃溪杏少意

思一作有誰顧自趁時節開春風看花遊女不知醜古粧

野態爭花紅人生行樂在一作當勉強有酒莫負瑤琬

鍾主人忽笑花與人嗟爾自是花前翁

四月九日幽谷見緋桃盛開

經年種花蒲幽谷花開不暇把一卮一作枝人生此事

尚難必况欲功名書品與深紅淺紫看雖好一作美顏

色不奈東風吹緋桃一樹獨後發意若待我留芳菲

清香嫩蘂含不吐日日恠我來何遲無情草木不解

語向我有意偏依依羣芳落盡始爛熳榮枯不與衆

豔隨念花意厚何以報唯有醉倒花東西盛開比落

猶數日清一作芳樽尚可三四携

秋懷二首寄聖俞一本擬孟如體秋懷

孤管叫秋月清砧韻霜風天涯遠夢歸一作歸遠夢驚斷

山千重群物動已息百憂感從中日月矢雙流四時

環無窮隆陰夷老物挫折壯士胸壯士亦何爲素絲

悲青銅

羣木落空原南山高巖從巉巖想詩老瘦骨寒愈聳

詩老類秋蟲吟秋聲百種披霜一作芳掇孤英泣古弔

荒冢琅玕叩金石清響聽生悚何由幸見之使我滌

煩冗飛鳥下東南音書無日捧

希真堂東一本無東字手種菊花十月始開

當春種花唯恐遲我獨種菊君勿謂春枝蒲園爛張

錦風雨須臾落顛倒看多易厭情不專鬪紫誇紅隨

俗好豁然高秋天地肅百一作萬物衰零誰暇弔君看

金蘂正芬敷曉日浮霜相照耀一本有後時寧與作

笑兩句煌煌正色秀可餐藹藹清香寒愈峭高人避喧

守幽獨淑女靜一作靚容修一作羞窈窕方當搖落看轉

佳慰我寂寥何以報時携一罇相就飲如得貧交論

久要我從多難壯心衰迹與世人殊靜躁種花勿一作

不種兒女花老大安能逐年少

拒霜花

芳菲能幾時顏色如自愛鮮鮮弄霜曉裊裊含風態

蕙蘭頌秋香桃李媚一作嬌春醉時節雖不同盛衰終

一致莫笑黃菊花籬根守憔悴

懷嵩樓晚飲示徐無黨無逸一本作奉和徐生見示懷嵩樓

晚飲一本無見示字

滁山不通車滁水不載舟舟車路所窮嗟誰肯來遊

念非吾在此二子來何求不見忽三年見之忘百憂

問其別後學初若繭緒抽縱橫漸組織文章爛然浮

引伸無窮極卒斂以軻邱少進日如此老退誠可羞

弊邑亦何有青山遶城樓冷冷谷中泉吐溜彼一作被

山幽石醜駭溪恠天竒瞰龍湫子初如可樂久乃歎
 以俟云此譬圖畫暫看已宜收荒涼一作村草樹間暮
 館南城取破屋仰見星窓風冷如鏤歸心中夜起輾
 轉卧不周我為辦酒肴羅列蛤與蚌酒酣微探之仰
 笑不領頭曰予非此儂又不負譴尤自非世不容安
 事此為囚幸以主人故崎嶇幾摧輶一來勤已多而
 况欲久留我語頓遭屈頽慚汗交流川塗冰已壯霰
 霜一作雪行將稠羨子兄弟秀雙鴻翔高秋噦噦飛且
 鳴歲暮憶南州飲子今日歡重我明日愁來貶辱已
 厚贈言媿非酬

瑯琊山六題

一本作山中六題
注云瑯琊山中

歸雲洞

洞門常自

一作似

起烟霞洞穴傍穿透谿谷朝看石上

片雲陰夜半山前春雨足

瑯琊谿

空山雪消谿水漲遊客渡谿橫古槎不知谿源來遠
 近但見流出山中花

石屏路

石屏自倚浮雲外石路久無人跡行我來携酒醉其
下卧看千峯秋月明

班春亭

信馬尋春踏雪泥醉中山水弄清輝野僧不用相迎
送乘興閑來興盡歸

庶子泉

庶子遺蹤留此地寒崑徙倚弄飛泉古人不見心可
見一片清光長皎然

惠覺方丈

青松行盡到山

一作松

門亂峯深處開方丈已能宴坐

老山中何用聲名傳海上

贈無為軍李道士二首

無為道士三尺琴中有萬古無窮音如石上瀉流
水瀉之不竭由源深彈雖在指聲在意聽不以耳而
以心心意既得形骸忘不覺天地白日愁雲陰

居士集卷之三終

歐陽文忠公全集

卷三

十五

山中向用聲各動

青林石盡隱山一門

居士集卷第四 集四

古詩二十四首

贈無為軍李道士二首名景山

無為道士三尺琴中有萬古無窮音音如石上瀉流水瀉之不竭由源深彈雖在指聲在意聽不以耳而以心心意既得形骸忘不覺天地白日愁雲陰

李師琴紋一作形如卧蛇一彈使我三咨嗟五音商羽

主肅絳颯颯坐上風吹沙忽然黃鍾回暖律當冬草木皆萌芽郡齋日午公事退荒涼樹石相交加李師

一彈鳳凰聲空山百鳥停嘔啞我怪李師年七十面

目明秀光如霞問胡以然一作試問胡以然笑語我慎

勿辛苦求丹砂惟當養其根自然燁其華一本無上二句又

云理身如理琴正聲不可干以邪我聽其言未云足

野鶴何事還思家抱琴揖我出門去獵獵歸袖風中

斜

拜赦一作勅

拜赦一作勅古州南山火明烈烈州人共喧喧兩州扶

白髮丁寧天語深曠蕩皇恩濶乃知天地施幽遠無

間別欣欣草木意喜氣消殘雪

彈琴效賈島體

古人不可見古人琴可彈彈為一作琴問古曲聲如與一作

聞古人言琴聲雖可聽琴意誰能論橫琴置牀頭當

午曝背眠夢見一丈夫嚴嚴古衣冠登牀取之坐一作

我調作南風絃一奏風雨一作南來再鼓變雲烟鳥獸

盡嚶鳴草木亦滋蕃乃知太古時未遠可追還方彼

夢中樂心知口難一作難傳既覺失其人起坐涕洟瀾

酬學詩僧惟晤

詩三百五篇作者非一人一作賤羈臣與弃一作妾桑濮乃

淫奔其言苟一作或可取一作為佛疵雜不全純子雖一作之

徒未易廢其言其言在合理但懼學不臻子佛一作之

與吾儒異轍難同輪一作共論子何獨吾慕自忘夷其身

苟能知所歸固有路自新誘進或可至拒之誠不仁

維詩於文章太山一浮塵又如古衣裳組織一作繡爛

成文拾其裁剪餘未識衮服尊嗟子學雖已一作勞徒

自苦骸筋一作涉江津勤勤袖卷軸一歲三及門惟一作

何求一言榮歸以耀一作輝其倫與夫榮其膚不若落

一作豈若習

其源韓子亦嘗謂收斂加以一作冠巾

別後奉寄聖俞二十五兄一本作叙別寄聖俞兼酬進道堂夜

話見寄之作

長河秋雨多夜插寒潮一作湖入歲暮孤舟遲客心飛

鳥急君老忘卑窮文字或綴緝余生苦難阮一作拙世

險蹈已習離合二十年垂睽多聚集常時飲酒別今

別輒飲泣君曰吾老矣不覺兩袖濕我年雖少君白

髮已揖揖即反憶初京北門送我馬暫立自茲遭檻

穿一落誰引汲顛危偶脫死藏窠甘自繫一作蟄但令

身尚在果得手重執聞來喜迎前貌改驚作揖別離

纔幾時舊學廢百十殘章一作編與斷藁草草各收拾

空窓一作堂語青燈夜雨聽霰霰一作滅滅明朝解舟南路

翼縱莫戢還期明月飲幸此中秋及酒酣弄篇章四

坐困供給歡言正喧譁別意忽於邑日暮北亭上濁

醪聊一作猶共挹輕一作歸橈動翩翩晚水明熠熠行心

一作貪前去雖迫訣語出猶澁歸來錄君詩卷軸多齷齪

誰一作雖云已老矣意氣何業炭惜哉方壯時千里足

常鬻知之莫予深力不足呼吸歎吁偶成篇聊用綴

君什

紫石屏歌一本作月石硯屏歌寄蘇子美

月從海底來行上天東南正當天中時下照千丈潭

潭心無風月不動倒影射入紫石巖月光水潔石瑩

淨一作徹感此陰魄來中潛自從月入此石中天有兩

曜分爲三清光萬古不磨滅天地至寶難藏緘天公

呼雷公夜持巨斧墮巖巖隳此一片落千仞皎然寒

鏡在玉奩蝦蟇白兔走天上空留桂影猶杉杉一作穆穆

景山得之一作號惜不得贈我意與一作比千金兼自

州刺史

云每到月滿時石在暗室光出簷大哉天地間萬怪
難悉談嗟予不度量每事思窮探欲將兩耳目所及
而與造化爭毫纖煌煌三辰行日月尤尊嚴若令下
與物爲比去聲擾擾萬類將誰瞻不然此石竟何物有
口欲說嗟如鉗吾竒一作如蘇子胸羅列萬象中包含
不惟胸寬瞻亦大屢出言語驚愚凡自吾得此石未
見蘇子心懷慚不經老匠先指決有手誰敢施鑄鏡
呼工畫石持寄似一作此幸子留意其無譏

聚星堂前紫薇花

亭亭紫薇花向我如有意高烟晚溟濛清露晨點綴
豈無陽春月所得時節異靜女不爭寵幽姿如自喜
音戲將期誰顧眄獨伴我憔悴而我不強飲繁英行亦
墜相看兩寂寞孤詠聊自慰

獲麟贈姚闢先輩

世已無孔子獲麟意誰知我嘗爲之說聞者未免非
而子獨曰然有如墳應筮惟麟不爲瑞其意乃可推
春秋二百年文一作辭約義甚夷一從聖人沒學者自
爲師崢嶸衆家說平地生嶮巇相公益迂怪各闢出

新奇爾來千餘歲

一作千載餘
一作千歲餘

舉世不知迷焯哉聖

人經照耀萬世疑自從蒙衆說日月遭蔽虧常患無

氣力掃除浮雲披還其自然光萬物皆見之子昔已

好古此經手常持超然出衆見不爲俗牽卑近又脫

賦

一作賤

格飛黃擺銜羈聖門開大道夷路肆騰嬉便

可勦衆說旁通

一作異端

塞多岐正途趨

一作常

簡易慎勿

事嶮崎著述須待老積勤宜少時苟思垂後世大禹

尚胼胝顧我今老矣兩瞳

一作目
一作眼

蝕昏眵大書難久

視心在力已衰因思少自弃今縱悔何追戒我以勉

子臨文但吁嘻

喜雨

大雨雖霽霈隔轍分晴陰小雨散浸淫爲潤廣且深

浸淫苟不止利澤何窮已無言雨大小

一作言雨
大小異小

雨農尤喜宿麥已登實新禾未抽秧

一作穗

及時一日

雨終歲飽豐穰夜響流霖霖晨暉霽蒼涼川原淨如

洗草木自生光童稚喜瓜芋耕夫望陂塘誰云田家

苦此樂殊未央

飛蓋橋翫月

一本題上有
六月十四夜

天形積輕清水德本虛靜雲收風波止始見天水性
 澄光與粹容上下相涵映乃於其兩間皎皎掛寒鏡
 餘暉所照耀萬物皆鮮瑩矧夫人之靈豈不醒視聽
 而我於此時翛一作倏然發孤詠紛昏忻洗滌俯仰恣
 涵泳一本無人心曠而閑月色高愈一作逾迴惟恐清
 夜欄時時瞻斗柄

竹間亭

啾啾竹間鳥日夕相嚶鳴悠悠水出藻與萍
 水竹魚鳥家伊誰作斯亭翁來無車馬非與彈弋并
 潛者入深淵飛者散縱橫奈何翁屢來浪使飛走驚
 忘爾榮與利脫爾冠與纓還來尋魚鳥傍此水竹行
 鳥語弄蒼翠魚遊翫清澄而翁乃何為獨醉還自醒
 三者各自適要歸亦同情翁乎知此樂無厭日來登

荅呂公著見贈

一本作奉荅通判太傅為予不飲見贈之作

晉人歌蟋蟀孔子錄於詩因知聖賢心豈不惜良時
 行樂不及早朱顏忽焉衰馳光如驟裏一去不可追
 今也不彊飲後雖悔奚為三年謫永陽陷窞不知危
 種樹滿幽谷疏泉瀉清池新陽染山木撩亂發枯枝

無人歌青春自醜白玉卮今者荷寬宥一作乞得

州從爾宜西湖舊已聞既見又過之菡萏間紅綠鴛

鴦浮渺瀰四時花與竹罇俎一作酒動可隨况與賢者

同薰然襲一作偉蘭芝醪醅寒且醪清唱婉而遲一作奇

四坐各已醉臨觴獨何疑昔人逢麴車流涎尚垂頤

况此盃中趣久得樂無涯多憂衰病早心在良可噫

一作喜譬若卧櫪馬聞鞞一作鼓尚鳴悲春膏已動脉一作

忽已動百卉漸歲蕤丹砂得新方舊疾庶可治尚可執

鞭弭周旋以忘疲

送滎陽魏主簿廣一本 作送魏廣

卓犖東一作魏都子姓名聞十年窮冬雪塞空千里至

我門子足未及闕我衣驚倒顛僕童一作童僕相視疑寮

吏或不然俛首鵠鶴咏進趨鳧鴈聯青衫靴兩一作靴

脚言色倩一作情以温於公門豈少乃獨得公權受知

固不易知士誠尤難我思屈童吏欲辯難以言觴豆

及嘉節高堂列羣賢文章看落筆論議馳後先破石

出至寶决高瀉長川光暉相磨晻浩渺肆波瀾寮吏

媿我嘆僕童一作童僕恪生顏我顧寮吏嘻士豈以此觀

此聊為戲耳以驚僕童

一作童僕

昏士欲見其守視其居

賤貧欲知其所趨試以義利干我始識其面已窺其

肺肝禮有來必往木瓜報琅玕十年思見之一日捨

我還何用慰離居贈子以短篇

青松贈林子

國華一本作贈林國華秘校

青松生而直繩墨易為功

一作次

良玉有天質少加

一作

假磨與礪子誠懷美材

一作君實有美才

但未遭良工養育

既堅好英華充厥中於誰以成之孟韓荀暨雄

人日聚星堂燕集探韻得豐字

汙池以其下眾流之所鍾尺水無長瀾蛟龍豈其容

顧予誠鄙薄羣俊枉高蹤得一不為少雖多肯辭豐

譬如登圓壇羅列壁與琮又若饗釣天左右間笙鏞

文章爛照耀應和相撞春而予處其間眩晃不知從

退之亦嘗云青蒿倚長松新陽發羣枯生意漸丰茸

暮雪浩

一作皓

方積醪醅寒更濃毋言輕此樂此樂難

屢逢

橄欖

五行居四時維火盛南訛炎焦陵木氣橄欖得之多

酸苦不相入初爭久方和霜苞入中州萬里來江波
幸登君子席得與衆果羅中州衆果佳珠圓玉光瑤
媿茲微陋質以遠不見訶錫飴兒女甜遺味久則那
良藥不甘口厥功見沉痾忠言初厭之事至悔若何
世已無採詩詩成爲君哦

鸚鵡螺

大哉滄海何茫茫天地百寶皆中藏牙鬚一作鬚甲角
爭光鎡腥風怪雨灑幽荒珊瑚玲瓏巧綴裝珠宮貝
闕爛烺烺泥居殼屋細莫詳紅螺行沙夜生光一本作珠

宮貝闕爛烺烺泥居殼室細莫詳珊瑚玲瓏負材自

累遭剝腸匹夫懷璧古所傷濃沙剝蝕隱文章一本注胡

人謂硎沙爲磨以玉粉綠一作鉛金黃清罇旨酒列華

堂隴鳥回頭思故鄉美人清歌蛾眉揚一醕凜冽回

一作爲春陽物雖微遠用則彰一螺千金價誰量豈若

泥下追含漿

食糟民

田家種糯官釀酒權利秋毫升與斗酒沽得錢糟弃
物一作不弃大屋經年堆欲朽酒醅澆潏如沸湯東風來

吹酒瓮香纍纍罌與瓶惟恐不得嘗官沽味醲村酒

薄日飲官酒誠可樂不見田中種糯人釜無糜粥度

冬春還來就官買糟食官吏散糟以為德嗟彼官吏

者其職稱長民衣食不蠶耕所學義與仁仁當養人

義適一作宜言可聞達力可施上不能寬國之利下

不能飽爾一作之飢我飲酒爾食糟爾雖不我責我

責何由逃

送焦千之秀才

焦生獨立士勢利不可恐誰言一身窮自待九鼎重

有能揭之行可謂仁者勇呂侯一作相家子德義勝

華寵焦生得其隨道合若膠輦始生及吾門徐子喜

驚踊曰此難致寶一失何由踵自吾得二生一作祭

祭獲雙珙奈何奪其一使我意紛葩吾嘗愛生材抽

擢方鬱翁音委勇反一作翁猶須老霜雪然後見森聳况從

主人賢高行可傾竦讀書趨簡要言說去雜冗新文

時我寄庶可蠲煩壅

伏日贈徐焦二生一本作徐焦二子伏日遊西湖余以病不能往因以

贈之

徐生純明白玉璞焦子皎潔寒泉冰清光瑩爾互輝
映當暑自可消炎蒸平湖綠波漲渺渺高樹一作古

未陰層層嗟哉我豈不樂此心雖欲往身未能俸優
食飽力不用官閑日永一作樂睡莫興不思高飛慕鴻

鵠反此愁卧償蚊蠅三年永陽子所見山林自放樂
可勝清泉白石對斟酌巖花野鳥一作草為交朋崎嶇

礪谷窮上下追逐猿狖爭超騰一作陸酒美賓佳足自
負飲酣氣橫猶驕矜奈何垂離纜幾日蒼顏非舊白

髮增彊歡徒勞歌且舞勉飲寧及合與升行指眼眵
一作旋看物坐見樓閣先愁登頭輕目明脚力健

子志氣將飄凌只今心意已如此終竟事業知一作將
何稱少壯及時宜努力老大無堪還可憎

寄生槐

一本題上有答
張推官庭槐

檜惟凌雲材槐實凡木賤奈何柔脆質累此孤高幹
龍鱗老蒼蒼鼠耳光粲粲因緣初莫原感咤徒自歎
偷生由附託得勢爭葱蒨方其榮盛時曾莫見真質
欲知窮悴節宜試以霜霰萌芽起微蘖辨別垂先見
剪除初非難長養遂成患雖然根性殊常恐枝葉亂

惟應植者深幸不習而變含容固有害勦絕須明斷
惟當審斤斧去惡無傷善

韓公

一本公作定州

閱古堂

兵閑四十年士不識金革水旱數千里民流誰豨闢
公初來視之嘻此乃予責將法多益辦萬千由十百
整齊一作容談笑間進退有寸尺曰此易爲耳在吾繩
與墨天成而地出古所重民食貯儲非一朝人命在
旦夕惟茲將奈何敢不竭吾力木牛尚可運玉磬一作
磬猶走糴因難乃見才不止將有得公言初未信終

歲考成績驕慎識恩威謳吟起羸瘠獯豸著行伍倉

廩飽堆積文章娛閑暇

一作弄閑散

傳記尋

一作觀

往昔英

英文與武粲粲圖四壁酒令列諸將談鋒摧辯客周
旋顧視間是不爲無益循吏一州守將軍萬夫敵於
公豈止然事業本夔稷富壽及黎庶威名懾夷狄當
歸廟堂上有位久一作况虛席大匠不揮斧衆工隨指
畫從容任羣材文武各以職

永州萬石亭

寄知永州王顧一本上有寄題注云柳子厚亭

天於生子厚稟予獨艱哉超凌驟拔擢過盛輒傷摧

國朝文忠公全集 卷四
三

其危慮

一作屬

心常使鳴聲哀投以空曠地縱橫放

天才山窮與水險下上極沿洄故其於文章出語多
崔嵬人迹所罕到遺蹤久荒頽王君好奇士後二百
年來翦雜發幽薈搜尋得瓊瑰感物不自貴因人乃
爲材惟知古可慕豈免今所哈我亦竒子厚開編每
徘徊作詩示同好爲我銘山隈

居士集卷第四終

居士集卷第五

集五

古詩一十八首

答原父

一作答
劉廷評

炎歊鬱然蒸午景熾方燄子來清風興蕭蕭吹几簟

又如沃瓊漿遽飲不知厭嗟子學苦晚白首困鉛槧

危疑奚

一作何

所質孔孟久已空羣儒室自私惟子通

且瞻幸時丐羸餘屢得飽飢歉嚴嚴

一作落落

春秋經大

法誰敢覘

一本有譬猶天之蒼
乃欲學而染兩句

三才失綱紀

一作紀綱五

代極昏墊盜竊恣胙

一作發

篋英雄爭奮劔興亡兩倉

卒事迹多遺欠

一作

纔能紀成敗豈暇誅姦僭聞見

患孤寡

一作

是非誰證驗嘗欣同好惡遂乞指瑕玷

反蒙華袞褒如譽嫫母豔救非當在早已暴

一作

何

由歛苟能哀癆痼其可惜針砭風舫或許邀湖綠方

灑灑

蟲鳴

葉落秋水冷衆鳥聲已停陰氣入墻壁百蟲皆夜鳴
蟲鳴催歲寒唧唧機杼聲時節忽已換壯心空自驚
平明起照鏡但畏白髮生

奉答子華學士

一作答

安撫江南見寄之作

一本無

下四字

百姓病已久一言難遽陳良醫將治之必究病所因

天下久無事人情貴因循優游以爲高

一作

寬縱以

爲仁今日廢其小皆謂不足論明日壞其大又云力

難振旁窺各陰拱當職自逡巡歲月侵墮頽紀綱遂

紛紜坦坦萬里疆蚩蚩九州民昔而安且富今也迫

以貧疾小不加理浸淫將徧身湯劑乃常藥未能去

深根鍼艾有奇功暫痛勿吟呻痛定支體胖乃知鍼

艾神猛寬相濟理古語六經存蠹弊革僥倖濫官絕
貪畧牧羊而去狼未爲不仁人俊又沉下位惡去善
乃伸賢愚各得職不治未之聞此說乃其要易知行
每艱遲疑與果決利害及掌間捨此欲有爲吾知力
徒煩家至與戶到飽飢而衣寒三王所不能豈特今
所一作獨難我昔忝諫列日常趨紫宸聖君堯舜心
今爲閱閱極憂勤子華當來時玉音耳嘗親上副明主意
下寬斯人屯江南彼一方巨細到可詢一作論諭以上
恩德當冬反陽春吾言乃其槩豈一作非止一方云

送張洞推官赴永興經略司

一本云送張推官掌機宜

自古天下事及時難必成爲謀於未然聰者或莫聽
患至而後圖智者有不能未遠前日悔可爲來者銘
熙熙彼西人老死織與耕狂羝一作氏一朝叛烽火四
面驚用兵五六年首惡竟逃刑仰賴天子聖乾坤量
包并苗頑不率德舜羽舞于庭謂此雖異類有生亦
含情籬籬被觸突譬若豨與羶馴擾以芻豢可呼隨
指令稱藩效臣職冠帶復人形四海得休息瘡痍肉
新生敢問前孰失恃安而弛兵酒肴爲善將循默乃

名卿慮患謂生事高談笑難行一方兵遽起愚智共
營營上煩天子仁盱食憂吾氓謀議及臺早幽棲訪
巖扃小利不足爲涓流助滄溟大功難速就倉卒始
改更徒自益紛擾何由集功名乃知深遠畫施設在
安平今也實其時鑑前豈非明嚴嚴經略府罇俎集
豪英千營飽而嬉萬馬牧在垆相公黃閣老與國爲
長城張子美而秀文章博羣經從軍古云樂知已士
所榮感激報恩義當來請長纓

寄聖俞

一作因馬察院至云見聖
俞於城東輒書長韻奉寄

凌晨有客至自西爲問詩老來何稽京師車馬曜朝
日何用擾擾隨輪蹄面顏憔悴暗塵土文字光彩垂
虹霓空腸時如秋蚓叫苦調或作寒蟬嘶語言雖巧
身事拙捷徑耻蹈行非迷我今俸祿飽餘賸念子朝
夕勤鹽齏舟行每欲載米送汴水六月乾無泥乃知
此事尚難必何況仕路如天一作丹梯朝廷樂善得賢
衆臺閣俊彥聯簪屨朝陽鳴鳳爲時出一枝豈惜容
其棲古來磊落材與知窮達有命理莫齊悠悠百年
一瞬息俯仰天地身醯雞其間得失何足校况與鳧

鶩爭稗稊憶在洛陽年各一作各年少對花把酒傾玻瓈

二十年間幾人在在者憂患多垂睽我今三載病不

飲眼眵不辨駟與驪壯心銷盡憶閑處生計易足纔

疏畦優游琴酒逐漁釣上下林壑相攀躋及身彊一作

壯健始為樂莫待衰病須扶攜行當買田清潁上與

子相伴把鋤犁

有馬示徐無黨

吾有千里馬毛骨何蕭森疾馳如奔風白日無留陰

徐驅當大道步驟中五音馬雖有四足遲速在吾心

六轡應吾手調和如瑟琴東西與南北高下山與林

惟意所欲適九州可周尋至哉人與馬兩樂不相侵

伯樂識其外徒知價千金王良得其性此術固已深

良馬須善馭吾言可為箴

天辰

天形如車輪晝夜常不息三辰隨出沒曾不差分刻

一本有其行一何勤北辰居其所帝座嚴尊極衆星

拱而環大小一作小大各有職不動以臨之任德不任力

天辰主下土萬物由生殖一動與一靜同功而異域

惟王知法此所以治萬國

再和聖俞見答

兩畿相望東與西書來三日猶為稽短篇投子譬瓦
 礫敢辱報之金裹蹄文章至寶被埋沒氣象往往干
 雲霓飛黃伯樂不世一作出四顧驤首空長嘶嗟哉
 我豈敢一作知子論詩一作賴子初指迷子言古淡
 有真味大羨豈須調以糞憐我區區欲彊學跛鼈曾
 不離汙泥問子初何得臻此豈能直到無階梯如其
 所得自勤苦何憚入海求靈犀周旋二紀陪唱和凡
 翼每竝鸞皇棲有時爭勝不量力何異弱魯攻彊齊

念子京師苦憔悴經年陋巷聽朝音潮一作晨雞兒啼妻

噤一作喜一作午未飯得米寧擇秕與稊石上紫豪一作毫一作家

故有剡藤瑩滑如玻瓈追惟平昔念少壯零落生死

嗟分睽一揮累紙恣奔放駿一作有若駕駱仍駮驪腹

雖朽虛氣豪橫猶勝諂笑病夏畦名聲不朽豈易得

仕宦得路終當躋年來無物不可愛花發有酒誰同

攜問我居留亦何事方春苦旱憂民犁

感春雜言一本題下有和呂公著

區陽文忠公全集 卷五
鳩鳴兮屋上雀噪兮簷間百鳥感春陽有如動機關
雄雌相呼和日夕聒聒不得閑砌下兩株樹枯條有
誰攀春風一夜來花葉何班班乃知天巧奪人力能
使枯木生紅顏奈何人爲萬物靈不及草木與飛翾
自從春來何所覺但恠睡美不覺白日高南山行逢
百花不着眼豈念四氣如回環却思年少憶一作念前
事雖有駟駿難追還奈何來日尚可樂曾不勉彊相
牽扳淶酒如春波黃金爲誰慳人生一世中一步一作
笑百險艱俟河之清不可得聊自歌此譏愚頑

廬山高贈同年劉中允歸南康

廬山高哉幾千仞兮根盤幾百里截然屹立乎長江
長江西來走其下是爲揚瀾左里一作今洪濤巨浪

日夕相舂撞雲消風止水鏡淨泊舟登岸而遠望兮

上摩青蒼一作雲霄以掩靄下壓后土之鴻厓試往造乎

其間兮攀緣石磴窺空控千巖萬壑響松檜懸崖巨

石飛流淙水聲聒聒亂人耳六月飛雪灑石缸仙翁

釋子亦徃徃而逢兮吾嘗惡其學幻而言咙但見丹

霞翠壁遠近映樓閣晨鍾暮鼓杳靄羅幡幢幽花野

草不知其名兮風吹露濕香澗谷時有白鶴飛來雙
幽尋遠去不可極便欲絕世遺紛疵羨君買田築室
老其下插秧盈疇兮釀酒盈缸欲令浮嵐暖翠千萬
狀坐卧常對乎軒窗君懷磊砢有至寶世俗不辨珉
與珏策名為吏二十載青衫白首困一邦寵榮聲利
不可以苟屈兮自非青雲白石有深趣其氣兀砭何
由降丈夫壯節似君少嗟我欲說安得巨筆如長杠
河南地望雄西京相公好賢天下稱吹噓死灰生氣

送徐生一作徐無黨之澠池

談談笑暖律回嚴凝曾陪樽俎被顧盼羅列臺閣皆

名卿一作徐生南國後來秀得官古縣依峻陵脚靴

手板實卑賤賢雋未可吏事繩攜文百篇赴知己西

望未到氣已增我昔初官便伊洛當時意氣尤驕矜

主人樂士喜文學幕府最盛多交朋園林相映花百

種都邑四顧山千層朝行綠槐聽流水夜飲翠幙張

紅燈爾來飄流二十載鬢髮蕭索垂霜冰同時竝遊

在者幾舊事欲說無人應一作鷹文章無用等畫虎名

譽過耳如飛蠅榮華萬事不入眼憂患百慮來填膺

美子年少一作少年正得路有如扶桑初日昇名高場屋
已得雋世有龍門今復登出門相送親與友何異籬
鷄瞻雲鳴嗟吾筆硯久已格感激短章一作章句因子興

葛氏鼎一本有歌字

大河昔決東南流蕭條東郡今遺湫我從故老問其
由云古五鼎藏高邱地靈川秀草木稠鬱鬱佳氣蒸
常浮惟物伏見數有周祕藏竒恠神所搜天昏地慘
鬼哭幽至寶欲出風雲愁蕩搖山川失維陬九龍大
戰驅蛟虬割然岸裂轟雲羈滑人夜驚鳥嘲啁婦走

抱兒扶白頭蒼生仰叫黃屋憂聚徒百萬如蚍蜉千
金一掃隨浮漚天旋海沸動九州此鼎始出人間留
滑人得之不敢收竒模古質非今侔器大難用識者
不以示世俗遭擲撇明堂會朝饗諸侯饗官百品供
王羞調以五味烹全牛時有用捨吾無求二三子學
雕琳球見之始驚中歎愀披荒斲古爭窮菟苦語難
出聲伊憂馬圖出河龜一作龍負疇自古恠說何悠悠
嗟吾老矣不能休勉彊作詩慙効尤

太白戲聖俞

一作讀李白集効其體

開元無事

一作太平

二十年五兵不用太白閑太白之精

下人間李白高歌蜀道難蜀道之難難於上青天李

白落筆生雲烟千竒萬險不可攀却視蜀道猶平川

宮娃扶來白已醉醉裏詩成醒不記忽然

一作來

乘興

登名山龍咆虎嘯松風寒山頭婆婆娑弄明月九域塵

土

一作下看塵世

悲人寰吹笙飲酒紫陽家紫陽真人駕雲

車空山流水空流花飄然已去凌青霞下看

一作堪笑

區

區郊與島螢飛露濕吟秋草

邊戶

家世為邊戶年年常備胡兒僮習鞍馬婦女能彎弧

胡塵朝夕起虜騎茂如無邂逅輒相射殺傷兩常俱

自從澶州盟南北結歡娛雖云免戰鬪兩地供賦租

將吏戒生事廟堂為遠圖身居界河上不敢界河漁

梅聖俞寄銀杏

一作和聖俞銀杏見寄代書之什

鷺毛贈千里所重以其人鴨脚雖百箇得之誠可珍

問予得之誰詩老遠且貧霜野摘林實京師寄時新

封包雖甚微採掇皆躬親物賤以人貴人賢棄而淪

開緘重嗟惜詩以報慇懃

與子華原父小飲坐中寄同州江十學士休

復

歲晚忽不樂相過偶乘閑百年纔幾時一笑得亦艱
 有酒醉嘉客無錢買嬌鬟問予官何為侍從聯朝班
 朝廷多賢材何用蒯與管白髮垂兩鬢黃金腰九環
 奈何章綬榮飾此木石頑於國略無補有慙常在顏
 幸蒙二三友相與文字間江子獨捨我一作是高鴻去
 難攀秋風動沙苑郡閣當南山吟詠日多暇詔條寬
 可頒寒雲雪一作幕紛糝幽鳥春絲蠻勝事日向好思

若何時還

述懷

歲律忽其周陰風慘遼復孤懷念時節朽質驚衰病
 憶始來京師街槐綠方映清霜一以零衆木少堅勁
 物理固如此人生寧久盛當時不樹立後世猶譏評
 顧我實孤生飢寒談孔孟壯年猶勇為刺口論時政
 中間蒙選擢官實居諫諍豈知身愈危惟恐職不稱
 十年困風波九死出檻穽再生君父恩知報犬馬性
 歸來見親識握手相弔慶丹心皎雖存白髮生一作日

已迸慙無羽毛彩來與鸞皇竝鍛翮追羣翔孤唳驚
衆聽嚴嚴玉堂署清禁肅而靜職業愧論思文章慙
詰命厚顏難久居歸計無荒逕偷閑就朋友笑語雜
嘲詠歡情雖索寞得酒猶豪橫羣居固可樂寵祿尤
難幸何日早收身江湖一漁艇

和劉原父澄心紙

一作奉賦
澄心堂紙

君不見曼卿子美真竒才久已零落埋黃埃子美生
窮死愈貴殘章斷藁如瓊瑰曼卿醉題紅粉壁壁粉
已剝昏烟煤河傾崑崙勢曲折雪壓太華高崔嵬自

從二子相繼沒山川氣象皆低摧君家雖有澄心紙
有敢下筆知誰哉宣州詩翁餓一作飢欲死黃鸝折翼

鳴聲哀有時得飽好言語似聽高唱傾金罍二子雖
死此翁在老手尚能工翦裁奈何不寄反示我如棄
正論求俳詼嗟我今衰不復昔空能把卷闔且開百
年干戈流戰血一國歌舞今荒臺當時百物盡精好
徃徃遺棄淪蒿萊君從何處得此紙純堅瑩膩卷百
枚官曹職事喜一作樂閑暇臺閣唱和相追陪文章自
古世不乏間出安知無後來

居士集卷第五終

居士 卷第六 集六

古詩二十五首

奉使契丹道中答劉原父桑乾河見寄之作

憶昨初受命同下紫宸朝
問君當何之笑指北斗杓
共念到幾時春風約回鑣
所持既異事前後忽相遼
歲月坐易一作若失山川行知遙
回頭三千里雙闕在

紫霄我老倦鞍馬安能事吟嘲
君才綽有餘新句益

一作亦飄飄前日逢呂郭解鞍憇
山腰僮僕相問喜馬

鳴亦蕭蕭出君桑乾詩寄我慰寂寥
又喜前見君相

期駐征軺雖知不久留一笑樂亦聊歸路踐冰雪還
家脫狐貂君行我即至春酒待相邀

書素屏

我行三千里何物與我親念此尺素屏曾不離我身
曠野多黃沙當午白日昏風力若牛弩飛砂還射人
暮投山椒館休此車馬勤開屏置牀頭輾轉夜向晨
卧聽穹廬外北風驅雪雲勿愁明日雪且擁狐貂温
君命固有嚴羈旅誠苦辛但苟一夕安其餘非所云

馬齧雪

馬飢齧雪渴飲

一作行路

冰北風卷地來

一作寒

崢嶸馬悲

躑躅人不行日暮塗遠千山橫我謂行人止歎聲馬
當勦力無悲鳴白溝南望如掌平十里五里長

一作長亭

與

短亭臘雪銷盡春風輕火燒原頭青草生遠客還

家紅袖迎樂哉人馬歸有程男兒雖有四方志無事

何須

一作煩

勤遠征

風吹沙

一本題上有北字

北風吹沙千里黃馬行确犖悲摧藏當

一作窮

冬萬物

慘顏

一作無

色冰雪射日生

一作爭

光芒一年百日風塵

道安得朱顏長美好攬鞍鞭一作起馬行勿遲酒熟

花開二月時

重贈劉原父一作憶昨
呈劉原父

憶昨君當使北時我往別君飲君家愛君小鬟初買

得如手未觸新開花醉中上馬不知夜但見九陌燈

火人誼譁歸來不記與君別酒醒起坐空咨嗟自言

我亦隨往矣行即逢君何恨邪豈知前後不相及歲

一作日月忽忽行無涯古北嶺口踏新雪馬孟山西看

落霞風雲一作雪暮慘失道路礮谷夜靜聞磨磨行迷

方嚮但看日度盡山險方逾一作行沙客心漸遠誠易

感見君雖晚喜莫加我後君歸祇一作纜十日君先躍

馬未足誇新年花發見回鴈歸路柳暗藏嬌鴉而今

一作今來春物已爛漫念昔草木冰未芽人生每苦勞事

役老去尚能憐物華從今有暇即相過安得載酒長

盈車

贈沈遵一作贈沈博
士歌并序

一本序云予昔於滁州作醉翁亭於琅琊山有

記刻石往往傳人間太常博士沈遵好奇之士

也聞而往遊焉愛其山水歸而以琴寫之作醉

翁吟一調惜不以傳人者五六年矣去年冬予

奉使契丹沈君會予恩冀之間夜闌酒半出琴而作之予既嘉君之好尚又愛其琴聲乃作歌以贈之

羣動夜息浮雲陰沈夫子彈醉翁吟醉翁吟以我名我初聞之喜且驚宮聲三疊何泠泠酒行暫止四坐

傾一本有為君屏百慮各以兩耳聽兩句有如風輕日暖好鳥語夜靜

山響春泉鳴坐思千巖萬壑醉眠處寫君三尺膝上

橫沈夫子恨君不為醉翁客不見翁醉一作醉翁山間亭

翁歡不待絲與竹把酒終日聽泉聲有時醉倒枕巖

石青山白雲為枕屏花間百鳥喚不覺日落山風吹

自醒一本有沈夫子君過滁陽今幾時滁人皆喜醉翁醉至今人人能道之長記山間逢太守籃輦

酪酏插花歸六句我時四十猶彊力自號醉翁聊戲客爾來

憂患十年間一本客字下作爾來繞十年遇酒飲不得軒裳外飾誠可榮鬢髮未

老嗟先白滁人思我雖未忘見我今應不能識沈夫

子愛君一罇復一琴萬事不可干其心自非曾是醉

翁客莫向俗耳求知音一本末兩句作高懷所得貴自適俗耳何用求知音可笑

人生不飲酒惟知白首戀黃金

答聖俞一本題下有高車見過

人皆喜詩翁有酒誰肯一醉之嗟我獨無酒數往從

一作就 翁何所為翁居南方我北走世路離合安可期

汴渠千艘日上下來及水門猶未知五年不見勞夢

寐三日始往何其遲城東賺河有名字萬家弃水為

汙池人居其上苟賢者我視此水猶漣漪入門下馬

解衣帶共坐習習清風吹溼薪熒熒煮薄茗四顧壁

立空無遺萬錢方丈飽則止一瓢飲水樂可一作何涯

况出新詩數十首珠璣大小光陸離他人欲一不可

有一作得君家筐篋滿莫持才大一作多名高乃富貴豈

比金紫包愚癡貴賤同為一邱土聖賢獨一作長如星

日垂道德內樂不假物猶一作所須朋友并良時蟬聲

漸已變秋意得酒安間醇與醅玉堂官閑無事業親

舊幸可從其私與翁老矣會有幾當弃百事勤追隨

感興五首齋於醴泉宮作

奉祠嚴祕館攝事整精誠歲晏悲木落天寒聞鶴鳴

念昔邱壑趣豈知朝市情弱齡嬰仕宦壯節慕功名

多病慙厚祿早衰歎餘生未知犬馬報安得遂歸耕

懷祿不知慙人雖不吾責貧交重意氣握手猶感激

煌煌腰間金兩鬢颯已白有生天地間壽考非金石

古人報一飯君子不苟得憂來自悲歌涕淚下沾臆
清夜雖云長白日亦易晚循環百刻中勢若丸走坂
盈虧自相補得失何足算餐霞可延年飲酒誠自損
未知辛苦長孰若適意短二者一何偷百年皆不免
顏回不著述後世存愈遠聖賢非虛名惟善爲可勉
仕宦希寸祿庶無飢寒迫讀書事一作爲文章本以代
耕織學成頗自喜祿厚愈多責挾山以超海事有非
其力君子貴量能無輕食人食

唧唧復唧唧夜歎曉未息蟲聲急愈尖病耳聞若刺
壯士易爲老良時難再得日月相隨東天行自西北
二者不相謀萬古無窮極安知人間世歲月忽已易

吳學士石屏歌

一作和張生鵬
樹屏一無和字

晨光入林衆鳥驚
膈膊羣飛鴉亂鳴
穿林四散投空去
黃口巢中飢待哺
雌者下啄雄高盤
雄雌相呼飛復還
空林無人鳥聲樂
古木參天枝屈蟠
下有怪石橫樹一作其
間烟埋草沒苔蘚斑
借問此景誰圖寫
乃是吳家石屏者
號工剗山取山骨
朝鏡暮斲非一日
萬象皆從石中出
吾嗟人愚不見天地造化一作造物之

初難乃云萬物生自然豈知鐫鑿刻畫醜與妍千狀
萬態不可殫神愁鬼泣晝一作日夜不得閑不然安得

巧工妙手憊精竭思不可到若無若有縹緲生雲烟

鬼神功成天地惜藏在號山深處石惟人有心無不

獲一作乃知人天地雖神一作公藏不得又疑鬼神

好勝憎吾儕欲極奇恠窮吾才乃一作故傳張生自西

來吳家學士見且咤醉點紫毫淋墨煤君才自與鬼

神鬪嗟我老矣安能陪

卡上祕食真螿一本題上云京師

纍纍盤中蛤來自海之涯坐客初未識食之先歎嗟

五代昔垂隔九州如剖瓜東南限淮海邈不通夷華

於一作于時北州人飲食陋莫加雞豚為異味貴賤無

等差自從聖人出天下為一家南產錯交廣西珍富

邛巴水載每連軸陸輸動盈車谿潛細毛髮海恠雄

鬚牙豈惟貴公侯閭巷飽魚鰕此蛤今始至其來何

晚邪螯蛾聞二名車螯一名車蛾久見南人誇璀璨殼如玉

斑斕點生花含漿不肯吐得火遽已呀共食惟恐後

爭先屢成譁但喜美無厭豈思來甚遐多慙海上翁

辛苦斲泥沙

送裴如晦之吳江

一本無下三字注
云席上分得已字

雞鳴車馬馳夜半聲未已
皇皇走聲利與日爭寸晷
而我獨何爲閑宴奉君子
京師十二門四方來萬里
顧吾坐中人暫聚浮雲爾
念子一扁舟片帆如鳥起
文章富千箱吏祿求斗米
白玉有時沾青衫豈須耻
人生足憂患合散乃常理
惟應當歡時飲酒如飲水

盤車圖

一本上題和聖俞
下注呈楊直講

淺山嶙嶙亂石轟轟山石礲
輦車碌碌山勢盤斜隨

澗谷側轍傾轆如欲覆出乎
兩崖之隘口忽見百里
之平陸坡長坂峻牛力疲
天寒日暮人心速楊生忍
飢官大學得錢買此纔盈
幅愛其樹老石硬山回路
轉高下曲直橫斜隱見妍
媼嚮背各有態遠近分毫
皆可辨自言昔一作古有數家筆畫古一作久傳多名姓

失後來見者知謂誰乞詩
梅老聊稱述古畫畫意不
畫形梅詩詠物無隱情忘
形得意知者寡不若見詩
如見畫乃知楊生真好竒
此畫此詩兼有之樂能自
足乃一作即爲富豈必金玉名
高貴朝看畫暮讀詩楊

生得此可不飢

答梅

一作和無梅字

聖俞莫登樓

在禮部貢院鎖試進士上元夜作

莫登樓樂哉都人方競遊樓闕夜氣春烟浮玉輪東
來從海陬纖靄洗盡當空留燈光月色爛不收火龍
嚼山祝千秋綠竿踏索雜幻優鼓喧管咽耳欲泯清
風嫋嫋夜悠悠瑩蹄文一作輪蹄走角車如流姪姹扶欄
車兩頭髡髦垂鬟嬌未羞念昔年少追朋儔輕衫駿
馬今則不中年病多昏兩眸夜視曾不如鴝鷓足雖
欲往意已休惟思睡眠擁衾裯人心利害兩不謀春
陽稍愆天子憂安得四野陰雲油甘澤以時豐麥薶
遊騎踏泥非我愁

答聖俞莫飲酒

此已下皆貢院中作

子謂莫飲酒我謂莫作詩
花開木落蟲鳥悲四時百
物亂我思朝吟搖頭暮感眉
雕肝琢腎聞退之此翁
此語還自違豈口自古不飲無不死惟

有為善不可遲

一作遺

功

旃曾世聖賢事不然文章千

載垂其餘醕酏一罇酒萬事崢嶸皆可齊腐腸糟肉
兩家說計較屑屑何其卑死生壽夭無足道百年長

短纜幾時但飲酒莫作詩子其聽我言非癡

思白兔雜言戲答公儀憶鶴之作

君家白鶴白雪毛我家白兔白玉毫誰將贈兩翁謂
此二物皎潔勝瓊瑤已憐野性易馴擾復愛仙格何
孤高玉兔四蹄不解舞不如雙鶴能清嘒低垂兩翅
趨節拍一作拍節婆娑弄影誇嬌嬈兩翁公儀一物者久
不見之心甚勞京師少年殊好尚意氣橫出爭雄豪
清罇美酒不輒飲千金爭買紅顏韶莫令少年聞我
語笑我乖僻遭譏嘲或被偷開兩家籠從此二物令

逍遙兔奔滄海却入明月窟鶴飛玉山千仞直上青
松巢索然兩衰翁何以慰無慘纖腰綠鬢既非老者
事玉山滄海一去何由招

戲答聖俞

鶴行而啄青玉觜枯松脚兔蹲而纍尖兩耳攢四蹄
徃徃於人家高堂淨屋

一作室

曾見之錦裝玉軸掛壁

垂乍見拭目猶驚疑羽毛慘澹眼睛活若動不動如
風吹主人矜誇百金買云此絕筆人間竒畫師畫生
不畫死所得百分三二爾豈如翫物翫其真凡物可

愛惟精神况此二物物之珍月光臨靜夜雪色凌清
晨二物於此時瑩無一點纖埃塵不惟可醒醉翁醉
能使詩老詩思添清新醉翁謂詩老子勿謂我愚老
弄兔兒憐鶴雛與子俱老其衰乎奈何反捨我欲向
去一作東家看舞姝須防舞姝見客笑白髮蒼顏君自
照

和梅龍圖公儀謝鷓

有詩鶴勿喜無詩鷓勿悲人禽固異性所趣各有宜
朝戲青竹林暮棲高樹枝咿啾山鹿鳴格磔野鳥啼

聲音不相通各以類自隨使鶴居籠中垂頭以一作

聽詩鷓鷓享鍾鼓魚鳥見西施鷓鶴不宜爭所爭良
可知虬蟬與蟻子為物固已微當彼兩交鬪勇如聞
鼓輦有心皆好勝未免爭是非於我一何薄於彼一
何私欄檻啄花卉叫號驚睡兒跳踉兩脚長落泊雙
翅垂何足充翫好於何定妍媸鷓口不能言夜夢以
告之主人起謝鷓從我今幾時僮奴謹守護出入煩
提攜逍遙遂棲息飲啄安雄雌花底弄日影風前理
毛衣豈非主人恩報効爾宜思主人今白髮把酒無

翠眉養鶴鷗又妬我言堪并頤

和聖俞感李花

昨日摘花初見桃今日摘花還見李晴風暖日苦相
催春物所餘知有幾中年多病壯心衰對酒思歸未
得歸不及牆根花與草春來隨處自芳菲

折刑部海棠戲贈聖俞二首

摇摇牆頭花笑笑弄顏色荒涼衆草間露此紅的皜
草木本無情及時如自得青春不可恃白日忽已昃
繞之重吟哦歸坐成歎息人生浪自苦得酒且開釋
不見宛陵翁作詩頭早白

摇摇牆頭花豔豔爭青娥朝見開尚少暮看繁已多
不惜花開繁所惜時節過昨日枝上紅今日隨流波
物理固如此去一作來知奈何達人但飲酒壯士徒
悲歌

刑部看竹劾孟郊體

花妍兒女姿零落一何速竹色君子德猗猗寒更綠
京師多名園車馬紛馳逐春風紅紫時見此蒼翠玉
凌亂迸青苔蕭疎拂華屋森森日影閑濯濯生意足

幸此接清賞寧辭薦芳醪黃昏人去

一作黃昏寂寂
一作寂寂人去

鎖空廊枝上月明春一作鳥宿

居士集卷第六終

居士集卷第七 集七

古詩二十二首

贈沈博士歌遵一作
醉翁吟

沈夫子胡為醉翁吟醉翁豈能知爾琴淞山高絕淞
水深空巖悲風夜吹林山一作泉溜白玉懸青岑一瀉

萬仞源莫尋醉翁每來喜登臨醉倒石上遺其簪雲
荒石老歲月侵子有三尺徽一作暉黃金寫我幽思窮

崎嶇自言愛此萬仞水謂是太古之遺音泉宗石亂
到不平指下嗚咽悲人心時時弄餘聲言語軟滑如

春禽嗟乎沈夫子爾琴誠工彈且止我昔被謫居滁

山名雖一作為翁實少年坐中醉客誰最賢杜彬琵琶

琴皮作絃自從彬死世莫傳玉練鎖東坡詩云新客從翻玉連鎖練

疑當聲入黃泉死生聚散日零落耳冷心衰翁索莫

國恩未報慙祿厚世事多虞嗟力薄顏摧鬢改真一

翁心以一作憂醉安知樂沈夫子謂我翁言何苦悲

人生百年間飲酒能幾時攬衣推琴起視夜仰見河

漢西南移

和聖俞李侯家鴨脚子

鴨脚生江南名實未相浮絳囊因入貢銀杏貴中州

致遠有餘力好奇自賢侯因令江上根結實夷門秋

始摘纔三四金奩獻凝旒公卿不及識天子百金酬

歲父子漸多纍纍枝上稠主人名好客贈我比珠投

博望昔所徙蒲萄安石榴想其初來時厥價與此侔

今也徧中國籬根及牆頭物性久雖在人情逐時流

惟當記其始後世知來由是亦史官法豈徒續君謳

京師無鴨脚樹駙馬都尉李和文自南方移植其地

送吳生南歸一作送吳孝

京字子京

自我得曾子於茲二十年今又得吳生既得喜且歎
 古士不竝出百年猶比肩區區彼江西其產多材賢
 吳生初自疑所擬豈其倫我始見曾子文章初亦然
 崑崙傾黃河渺漫盈百川決疏以道一作導之漸斂收
 橫瀾東溟知所歸識路到不難吳生始見我袖藏新
 文篇一作編忽從布褐中百寶寫一作瀉我前明珠雜璣
 貝磊珂或不圓問生久懷此奈何初無聞吳生不自
 隱欲吐羞俛顏少也不自重不為鄉人憐中雖知自
 悔學問苦賤貧自謂久而信力行困彌堅今來決疑
 惑幸冀蒙洗滌我笑謂吳生爾其聽我言世所謂君
 子何異於衆人衆人為不善積微成滅身君子能自
 知改過不逡巡惟於斯二者愚智遂以分顏回不貳
 過後世稱其仁孔子過而更日月披浮雲子路初來
 時雞冠佩豸豚斬蛟射白額後卒為名臣子既悔其
 往人誰禦其新醜夫祀上帝孟子豈不云臨行贈此
 言庶可以書紳

樂哉襄陽人送劉太尉從廣

一作景元赴襄陽一本

無丁二字

景元蓋字

嗟爾樂哉襄陽人萬屋連甍清漢濱語言輕清微帶
秦南通交廣西峨岷羅穀織麗藥物珍枇杷甘橘薦

清罇磊落金盤爛璘璘槎頭縮項昔所聞黃橙搏一作

新橙搏馨香復辛春雷動地竹走根錦苞玉筍味爭新

鳳林花發南山春掩映谷口藏山門樓臺金碧瓦鱗

鱗峴首高亭倚浮雲漢水如天瀉汙汙斜陽返照白

鳥羣兩岸桑柘雜耕耘文王遺化已寂寞千載誰復

思其仁荊州漢魏以來重古今相望多名臣嗟爾樂

哉襄陽人道扶白髮抱幼孫遠迎劉侯朱兩一作朱輪

劉侯年少氣甚淳詩書學問若寒士罇俎談笑多嘉

賓往時邢洺一作室有善政至今遺愛留其民誰能持

我詩以往為我先賀襄陽人

奉酬揚州劉舍人見寄之作原父一作酬劉原父見寄

別君今幾時歲月如插羽悠悠寢與食忽忽朝復暮

紛紛竟何為凜凜還自懼朝廷無獻納倉廩徒耗蠹

風霜苦見侵衰病日增故江湖豈不思懇悃布已屢

美哉廣陵公風政傳道路優游侍從臣左右天子顧

君來一何遲我請亦有素何當兩還分尚冀一相遇

把手或未能尺書幸時寓

西齋手植菊花過節始開偶書奉呈聖俞

秋風吹浮雲寒雨灑清曉鮮鮮牆下菊顏色一何好
好色豈能常得時仍不早文章損精神何用覩天巧
四時悲代謝萬物惜凋槁豈知寒檻中兩鬢甚秋草
東城彼詩翁學問同少年一作小風塵世事多日月良
會少我有一罇酒念君思共倒上浮黃金藥送以清
歌裊爲君發朱顏可以却君老

於劉功曹家見楊直講褒女奴彈琵琶戲作

呈聖俞

大絃聲遲小絃促十歲嬌兒彈啄木啄木不啄新生
枝惟啄槎牙一作枯樹腹花繁蔽日鎖空園樹老參

天杳深谷不見啄木鳥但聞啄木聲春風和暖百鳥
語山路磽确行人行啄木飛從何處來花間葉底時
丁丁林空山靜啄愈響行人舉頭飛鳥驚嬌兒身小
指撥硬功曹廳冷絃索鳴繁聲急節傾四坐爲爾飲
盡黃金觥楊君好雅心不俗太學官早飯脫粟嬌兒
兩幅青布裙三脚木牀坐調曲奇書古畫不論價盛

國朝文忠公全集卷之七
以錦囊裝玉軸披圖掩卷有時倦卧聽琵琶仰看屋
客來呼兒旋杙洗滿額花鈿貼黃菊雖然可愛眉目
秀無奈長饑頭頸縮宛陵詩翁勿謂渠人生自足乃
爲娛此兒此曲翁家無

長句送陸子履學士通判宿州

一本作
亳州非

古人相馬不相皮瘦馬雖瘦骨法奇世無伯樂良可
嗤千金市馬惟市一作肥騏驥伏櫪兩耳垂夜聞秋
風仰秣嘶一朝絡以黃金羈旦刷一作吳越暮燕隄
丈夫可憐憔悴時世俗庸庸皆見遺子履自少聲名

馳落筆文章天下知開懷吐胸不自疑世路迫窄多
弃機鬢毛零落風霜摧十年江湖千首詩歸來京國
舊遊非大笑相逢索酒卮酒酣猶能弄蛾眉山川搖
落百草腓愛君不改青松枝念君明當整駮駢贈以
瑤華期早歸豈惟朋友相追隨坐使臺閣生光輝
送公期得假歸絳

風吹積雪銷太行水暖河橋楊柳芳少年初仕即京
國故里幾歸成鬢霜山行馬瘦春泥滑野飯天寒錫
粥香留連芳一作物佳節過東帶還來朝未央

送宋次道學士赴一作太平州求

古堤老柳藏一作楊柳排春烟桃花水下清明前江南太

守見之笑擊鼓插旗催解船一作打鼓插旗催發船侍中令德

宜有後學士清才方少年文章秀粹得家法筆畫點

綴多餘一作逾妍藏書萬卷復強記故事累朝能口傳

來居侍從乃其職遠置州郡誰謂本多然交游一時

盡英一作豪俊車馬兩岸來聯翩船頭朝轉暮千里有

酒胡不為一作為不留連

謝觀文王尚書惠西京牡丹舉正

京師輕薄兒意氣多豪俠爭誇朱顏事年少肯慰白

髮將花插尚書好事與俗殊憐我霜毛苦蕭颯贈以

一作寄贈洛陽花滿盤鬪麗爭奇紅紫雜兩京相去五百

里幾日馳來足何捷紫檀金粉香未吐綠萼紅苞露

猶浥謂我嘗為洛陽客頗向此花曾涉獵憶昔進士

初登科始事相公沿吏牒河南官屬盡賢俊洛城池

一作苑籞相連接我時年纔二十餘每到花開如蛺蝶

姚黃魏紫腰帶鞋潑墨齊頭藏綠葉鶴翎添色又其

次此外雖妍猶婢妾爾來不覺三十年歲月纔如熟

羊腍無情草木不改色多難人生自摧拉見花了了
雖舊識感物依依幾枚隄念昔逢花必沽酒起坐驩
呼屢傾榼而今得酒復何為愛花繞之空百匝心衰
力懶難勉彊與昔一何殊勇怯感公意厚不知報墨
筆淋漓口徒聒

送朱職方提舉運鹽一本表臣

齊人謹一作建鹽筴伯者之事爾計口收其餘登耗以
生齒民充國亦富粲若有條理惟一作雖非三王法儒
者猶為耻後世益不然權奪由漢始權量自持操屑

屑已甚矣穴竈如蜂房熬波銷海水豈知戴白民食
大有至死物艱利愈厚令出姦隨起良民陷盜賊峻
莫禁止問官得幾何課煩答筭公私兩皆然巧

可知已英英職方郎文行粹而美連年宿與泗有
政皆可紀忽來從辟書感激赴知己閔然哀遠人吐
策獻天子治國如治身四民猶四體奈何室其一無
異鈇厥趾工作而商行一作與商賈本末相表裏臣請通

其流為國掃泥滓金錢歸府藏滋味飽閭里利害難
先言歲月可較比鹽官皆謂然丞相曰可喜適時乃

為才高論徒譎詭夷吾苟今一作復出未以彼易此隋

堤樹穆穆汴水流瀾瀾子行其勉旃吾黨方傾耳

嘗新茶呈聖俞

建安三千里京師三月嘗新茶人情好先務取勝百

物貴早相矜誇年窮臘盡春欲動蟄雷未起驅龍一作

龍未起驅蟲一作地夜聞擊鼓滿山谷千人助叫聲喊呀萬木

寒癡睡不醒惟有此樹先萌芽乃知此為最靈物宜

一作疑其獨得天地之英華終朝採摘不盈掬通犀鑄

小圓復宍鄙哉穀雨槍與旗多不足貴知

太守急寄我香蕪包裹封題斜泉甘器潔天色好坐

中揀擇客亦嘉一作佳新香嫩色如始造不似來遠從

天涯停匙側盞試水路拭目向空看乳花可憐俗夫

把金錠一作挺一作錠茶錄多用挺字為古按集猛

火炙背如蝦蟇由來真物有真賞坐逢詩老頻咨嗟

須申共起索酒飲何異奏雅終淫哇

次韻再作一本云茶歌

吾年向老世味薄所好未衰惟飲茶建谿苦遠雖不

到白少嘗見閩人誇每啜江浙凡茗草叢生狼藉惟

藏地

今江浙茶園俗言多地

豈如含膏入香作金餅蜿蜒兩龍

戲以呀其餘品第亦奇絕愈小愈精皆露芽泛之白

花如粉乳乍見紫面生光華手持心愛不欲碾有類

弄印幾成窠論功可以療百疾輕身久服勝一作胡

麻我謂斯言頗過矣其實最能祛睡邪茶官貢餘偶

分寄地遠物新來意嘉親烹屢酌不知厭自謂此樂

真一作誠無涯未言久食成手鷗已覺疾飢一作病生眼

花客遭水厄疲捧椀口吻無異蝕月暮僮奴傍視疑

復笑嗜好乖僻誠堪嗟更蒙酬句恠可駭兒曹助噪

聲哇哇

樂郊詩

為劉原甫作一本注原父鄆州東園也

樂郊何所樂所樂從公遊三日公不出其民感然愁

一聞車馬音從者如雲浮吾問鄆之人無乃失業不

云惟安其業然後樂其休樂郊何所有胡不考公詩

有山在其東有水出透夷有臺以臨望有沼以游嬉

俯仰迷上下朱欄映清池草木非一種青紅隨四時

其餘雖瑣屑處置各有宜樂郊何以名吾為本其意

自古賢哲人所存非一世當時偶然迹來者因不廢

鄆非公久留公去民孰賴此亭公所登此樹公所憇
俾民百年思豈取一日醉

洗兒歌

為聖俞作一本云前日送酒遂助
洗兒輒成短歌更資一笑呈聖俞

月暈五色如虹霓深山猛虎夜生兒虎兒可愛

憐一作

光陸離開眼已有百步威詩翁雖老神骨秀想見嬌

嬰目與眉木星之精為紫氣照山生玉水生犀兒

一作

此翁不北他兒翁三十年名天下知材高位下眾所

惜天與此兒聊慰之翁家洗兒眾人喜不

莫一作

惜金

錢散閭

一作

里宛陵他日見高門車馬煌煌梅氏子

鳴鳩 崇政殿後
考試所作

天將陰鳴鳩逐婦鳴中林鳩婦怒啼無好音天雨止

鳩呼婦歸鳴且喜婦不亟歸

一作
急還

呼不已逐之其去

恨不早呼不肯來固其理吾老病骨知陰晴每愁天

陰聞此聲日長思睡不可得遭爾聒聒何時停眾鳥

笑鳴鳩爾拙固無匹不能娶巧婦以共營家室寄巢

生子四散飛一身有婦長相失夫婦之恩重太山背

恩棄義須臾間心非無情不得已物有至拙誠可憐

君不見人心百態巧且艱臨危利害兩相關朝為親

戚暮仇敵自古常嗟交道難

代鳩婦言

一本注聞士有欲弃妻者作

斑然錦翼花簇簇雄雌相隨樂不足抱雛出卵翅羽
成豈料一朝還反目人言嫁雞逐雞飛安知嫁鳩被
鳩逐古來有盛必有衰富貴莫忘貧賤時女棄父母
嫁一作婦曰歸中道捨君何所之天生萬物各有類誰
謂鳥獸為無知雖無仁義有情愛苟聞此言寧不悲
看花呈一作有韓子華內翰崇政殿後考試作
老雖可憎還可嗟病眼昏愁看花不知花開桃與

李但見紅白何交加春深雨露洗新濯日暖金碧相
輝華浮香著物收不得含意欲吐情無涯可愛踈簾
靜相對最宜落日初西斜時傾賜壺共斟酌及此蜂
鳥方誼譁比花易見不足數禁籞難到堪歸誇老病
對此不知厭年少何用苦思家

啼鳥

崇政殿後考試舉人卷子作

提葫蘆提葫蘆不用沽美酒宮

一作官

壺日賜新醪醅

老病足以扶衰朽百舌子百舌子莫道泥滑滑宮花
正好愁雨來暖日方催花亂發苑樹千重綠暗春珍

禽綵羽自成羣花間祇慣迎黃屋鳥語初驚見外人
千聲百轉忽飛去一作來枝上自落紅紛紛畫簾陰陰
隔宮燭禁漏杳杳深千門可憐枕上五更聽不似淞
州山裏聞

和聖俞

一本二字作入

唐書局後叢莽中得芸香一

本之作用其韻

有芸黃其華在彼衆草中清香濯曉露秀色柔春風
幸依華堂陰一顧曾不蒙大雅彼君子偶來從學宮
文章高一世論議一作伏羣公多識由博學新篇匪
雕蟲唱酬爛衆作光輝發幽叢在物苟有用得時寧
久窮可嗟凡草木糞壤自青紅

答劉原父舍人見過後中夜酒定復追昨日
所覽雜記并簡梅聖俞之作

君子忽我顧

一作顧我

貧家復何有虛堂來清風佳果薦

濁酒簡編記遺逸論議相可否欲知所書人其骨多
已朽前者旣已然後來寧得久所以昔人云杯行莫
停手

居士集卷第七終

...

...

...

...

...

居士集卷第八 集八

古詩二十一首

有贈余以端谿綠石枕與蘄州竹簟皆佳物也余既喜睡而得此二者不勝其樂奉呈原父舍人聖俞直講

端谿作出缺月樣蘄州織成雙水一作錦紋呼兒置枕

展方簟赤日正午天無雲黃琉璃光綠玉潤瑩淨冷

滑無埃一作纖塵憶昨開封暫陳力屢乞殘骸避煩劇

聖君哀憐大臣閔察見衰病非虛飾猶蒙不使如一作

加罪去特許遷官還舊職選材臨事不堪用見利無

慙惟苟得一從儻舍一作屋居城南官不坐曹門一作閑

少客自然唯與睡相宜以懶遭一作閑何愜適從來

羸爾苦疲困況此煩歎正炎赫少壯喘息人莫聽中

年鼻軒尤惡聲癡兒掩耳謂雷作竈婦驚窺疑釜鳴

蒼蠅蠖螿任綠撲蠹一作詩書懶架拋縱橫神昏氣濁

一如此言語思慮何由清嘗聞李白好飲酒欲與鐺

杓同生死一作死生我今好睡又過之身與二物為三爾

江西得請在旦暮收拾歸裝從此始終當卷簾攜枕

去築室買田清潁尾

夜聞風聲有感奉呈原父舍人聖俞直講

夜半羣動息有風生樹端颯然飄我衣起坐為長歎

苦暑君勿厭初涼君勿歡暑在物猶盛涼歸歲將寒

清霜忽以飛零落亦溥溥霜露一作四時本無情豈肯私

蕙蘭不獨草木爾君形安得完櫛髮變新白鑑容銷

一作無故丹風埃共侵迫心志亦摧殘萬古一飛隼兩

曜雙跳丸擾擾賢與愚流沙逐驚湍其來固如此獨

久知誠難服食為藥悞此言真不刊但當飲美酒何

區陽文忠公全集 卷八
必被輕紈

答梅聖俞大雨見寄

夕雲若頽山夜雨如決渠俄然見青天
燄燄升蟾蜍倏忽陰氣生四面如吹噓
狂雷走昏黑驚電照夔臚搜尋起龍蟄
下擊墓與墟雷聲每軒轟雨勢隨疾徐
初若浩莫止俄收闐無餘但掛千丈虹
紫翠橫空虛頃刻百變態晦明誰卷舒
豈知下土人水潦沒襟裾擾擾泥淖中
無異鴨與豬嗟我來京師庇身無弊廬
開坊儼古屋卑陋雜里閭鄰注湧溝竇
街流溢庭除出門愁浩渺閉戶恐爲瀦
牆壁豁四達幸家無貯儲蝦蟇鳴竈下
老婦但欬歔九門絕來薪朝爨欲毀車
壓溺委性命焉能顧圖書乃知生堯時
未免憂爲魚梅子猶念我寄聲憂我居
慰我以新篇琅琅比瓊琚官閑行能薄
補益愧空踈歲月行晚矣江湖盍歸歟
吾居傳郵爾此計豈躊躇

答聖俞白鸚鵡雜言

憶昨滁山之人贈我玉兔子
粵明年春玉兔一有死子字
日陽晝出月夜明世言兔子望月生
謂此瑩然而白

者譬夫水之為雪而為冰皆得一陰凝結之純精常
 恨處非大荒窮北極寒之曠野養適其性天厥齡豈
 知火維地荒絕漲海連天沸天一作火熱黃冠黑距
 人語言有烏玉衣尤皎潔乃知物生天地中萬殊難
 以一理通海中洲一作島窮人迹來市廣州纔八國
 其間注輦來最稀一作遠此鳥何年隨海舶誰能徧歷
 海上峰萬恠千竒安可極兔生明月月在天玉兔不
 能久人間况爾來從炎瘴地豈識中州霜雪寒渴雖
 有飲飢有啄羈紲終知非爾樂天高海闊路一作終茫

茫嗟爾身微羽毛弱爾能識路知所歸吾欲開籠縱
 爾飛俾爾歸詫宛陵詩此老詩名聞四夷

清明前一日韓子草以靖節斜川詩見招遊

李園既歸遂苦風雨三日不能出窮坐一室

家人輩倒殘壺得酒數杯泥深道路無人行

去市又遠索於筐筥一作篋得枯魚乾鰕數種

彊飲疾醉昏然便寐既覺索然因書所見奉

呈聖俞

少年喜追隨老大厭諠譁慙愧二三子邀我行看花

花開豈不好時節亦云嘉因病既不飲衆歡獨成一作
 我嗟管絃暫過耳風雨愁還家三日不出門堆豨類
 寒鴉妻兒強我飲釘餽果與瓜濁酒傾殘壺枯魚雜
 乾鰕小婢立我前赤脚兩髻丫軋軋鳴雙絃正如舫
 嘔啞坐令江湖心浩蕩思無涯寵祿不知報鬢毛今
 已華有田清潁間尚可事桑麻安得一黃犢幅巾駕
 柴車

奉答原甫見過寵示之作

不作流水聲行將二十年吾生少賤足憂患憶昔有

罪初南遷飛帆洞庭入白浪墮淚三峽聽流泉援琴

寫得入此曲聊以自慰窮山間中間永陽亦如此醉

卧幽谷聽潺湲自從還朝戀榮

一作寵

祿不覺鬢髮俱

凋殘耳衰聽重手漸顫自惜指法將誰傳偶欣日色

曝書畫試拂塵埃張斷絃嬌兒癡女逸翁膝爭欲彊

翁聊一彈紫微閣老適我過愛我指下聲冷然戲

一作

語君此是伯牙曲自古常歎知音難君雖不能琴能

得琴

一作其

意斯為賢自非樂道甘寂寞誰肯顧我相

留連興闌束帶索馬去却鎖塵匣包青氈

會飲聖俞家有作兼呈原父景仁聖從

憶昨九日訪君時正見堦前兩叢菊愛之欲繞行百
匝庭下不能容我足折花却坐時嗅之已醉還家手
猶馥今朝我復到君家兩菊堦前猶對東枯莖槁葉
苦風霜無復滿叢金間綠京師誰家不種花碧砌朱
欄敞華屋奈何來對兩枯株共坐窮簷何局促詩翁
文字發天葩豈比青紅凡草木凡草開花數日間天
葩無根長在目遂令我每飲君家不覺長餅卧牆曲
坐中年少皆賢豪莫怪我今雙鬢禿須知朱顏不可

恃有酒當歡

一作飲

且相屬

依韻奉酬聖俞二十五兄見贈之作

與君結交遊我最先衆人我少旣多難君家常苦貧
今爲兩衰翁髮白面亦皺念君懷中玉不及市上珉
珉賤易爲價玉棄久埋塵惟能吐文章白虹射星辰
幸同居京城遠不隔重闈朝罷二三公隨我如魚鱗
君聞我來喜置酒留逡巡不待主人請自脫頭上巾
歡情雖漸鮮老意益相親窮達何足道古來茲理均
小飲坐中贈別祖擇之赴陝府

無擇

明日君當千里行
 今明始共一罇酒
 豈惟明日難重
 持試思此會何嘗有
 京師九衢十二門
 車馬煌煌事
 奔走花開誰得屢
 相遇盍到莫辭頻
 舉手驩情落
 寞酒量減置我不須
 論老朽奈何公等氣
 方豪雲夢正當吞
 八九擇之名聲重
 當世少也多奇晚
 方偶西州政事藹
 風謫不批文章煥
 星斗待君歸日我
 何爲手把鋤犁汝
 陰叟

奉答聖俞達頭魚之作

吾聞海之大物類無窮極
 蟲鰕淺水間羸蜺如山積

毛魚與鹿角一龠

一作拾

數千百收藏各有時嗜好無

南北其微

一作小

既若斯其大有

一作其大固一作大者固

莫測波

濤浩渺中島嶼生頃刻俄而沒不見始悟

一作久始

出背

脊有時隨潮來暴死疑遭謫海人相呼集刀鋸爭剖

一作斫

析骨節駭專車鬚芒

一作牙

伴劍戟腥聞數十里

餘臭久乃息始知百川歸固有含容德潛奇與祕寶

萬狀

一作物

不一識嗟彼達頭微誰傳到

一作偶傳到一作偶傳入

京國乾枯少滋味治

平聲

洗費炮炙聊茲知異物豈足

薦佳客一旦辱

一作得

君詩虛名從此得

京師人不識此魚滄州向

防禦見寄以分
聖俞辱以詩答

送刁紡推官

一本無
二字

歸潤州

翹翹名家子自少能慷慨嘗從幕府辟躍馬臨窮塞
是時西邊兵屢戰輒一作無
功屢奔潰歸來買良田俛首
學秉耒家爲白酒醇門掩青山對優游可以老世利
何足愛奈何從所知又欲向并代主人忽南遷此計
亦一作
乃中悔彼在吾往一作
乃從彼去吾亦退與人交
若此可以言節槩

夜坐彈琴有感二首呈聖俞

吾愛陶靖節有琴常自隨無絃人莫聽此樂有誰知
君子篤自信衆人喜隨時其中苟有得外物竟何爲
寄謝伯牙子何須鍾子期

鍾子忽已死伯牙其已乎絕絃謝世人知音從此無
瓠巴魚自躍此事見於書師曠嘗一鼓羣鶴舞空虛
吾恐二三說其言皆過歟不然古今人愚智邈已殊
奈何人有耳不及鳥與魚

二月雪

寧傷桃李花無損杞與菊杞菊吾所嗜惟恐食不足

花開少年事不入老夫目老夫無遠慮所急在口腹
風晴日暖雪初銷踏泥自採籬邊綠

歸田四時樂春夏二首

秋冬二首命
聖俞分作

春風二月三月時農夫在田居者稀新陽晴暖動膏
脉野水泛濫生光輝鳴鳩聒聒屋上啄布穀翩翩桑
下飛碧山遠映丹杏發青草暖眠黃犢肥田家此樂
知者誰吾獨知之胡不歸吾已買田清潁上更欲臨
流作釣磯

南風原頭吹百草草木叢深茅舍小麥穗初齊稚子

嬌桑葉正肥蠶食飽老翁但喜歲年熟餉婦安知時
節好野棠黎密啼晚鶯海石榴紅囀山鳥田家此樂
知者誰我獨知之歸不早乞身當及彊健時顧我嗟
跼已衰老

明妃曲和王介甫作

胡人以鞍馬爲家射獵爲俗泉甘草美無常處鳥驚
獸駭爭馳逐誰將漢女嫁胡兒風沙無情貌如玉身
行不遇中國人馬上自作思歸曲推手爲琵琶却手
琵琶胡人共聽亦咨嗟玉顏流落死天涯琵琶

一作
此曲却傳

來漢家漢宮爭按新聲譜遺恨已深聲更苦纖纖女
手生洞房學得琵琶不下堂不識黃雲出塞路豈知
此聲能斷腸

盆池

西江之水何悠哉經歷瀨石險且回餘波拗怒猶一作

獨涵去澹奔濤擊浪常喧唳有時夜上滕王閣月照

淨練一作綠無纖埃揚瀾左里在其北無風浪起傳古

來老蛟深處厭窟穴蛇身微行見者猜呼龍漈酒未

及祝五色粲一作照爛高崔嵬忽然遠引千丈去百里

水面中分開收蹤滅跡莫知處但有雨雹隨風雷千

竒萬變聊一戲豈一作肯顧溺死爲可哀輕人之命若

螻螳不止山嶽將傾頽此外魚鰕何足道厭飫但覺

腥盤杯壯哉豈不快耳目胡爲守此空牆隈陶盆斗

水仍下漏四岸久雨生莓苔遊魚撥撥不盈寸泥潛

日炙愁暴鯁魚誠不幸此弱促我能決去反徘徊

再和明妃曲

漢宮有佳一作美人天子初未識一朝隨漢使遠嫁單

于國絕色天下無一失難再得雖能殺盡工於事竟

何益耳目所及尚如此萬里安能制夷狄漢計誠已拙女一作美色難自誇明妃去時淚灑向枝上花狂風日暮起飄泊落誰家紅顏勝人多薄命莫怨春風當自嗟

奉送原甫侍讀出守永興

一作奉送永興安撫劉侍讀

酌君以荊州魚枕之蕉贈君以宣城鼠須之管酒如

長虹飲滄海筆若駿馬馳平坂愛君尚一作少力方

豪嗟我久衰歡漸鮮文章驚世知一作名早意氣論

交相得晚魚枕蕉一舉十分當覆盞鼠須管為物雖

微情不淺新詩醉墨時一揮別後寄我無辭遠

哭聖俞

昔逢詩老伊水頭青衫白馬渡伊流灘聲八節響石

樓坐中辭氣凌清

一作高

秋一飲百盞不言休酒酣思

逸語更適河南丞相稱賢侯後車日載枚與鄒我年

最少力方優明珠白璧相報投詩成希深擁鼻謳師

魯卷舌藏戈矛三十年間如轉眸屈指十九歸山邱

凋零所餘身百憂晚登玉墀侍珠旒詩老薤鹽太學

愁乖離會合謂無由此會天幸非人謀頰鬚已白齒

根浮子年加我貌則不歡猶可疆閑屢偷不覺歲月
 成淹留文章落筆動九州釜甑過午無饋餽良時易
 失不早收篋櫝一作櫃瓦礫遺琳瑯薦賢轉石古所尤

幽翩然素

子有淚流如溝

居士集卷第八終

